


PL
2705
.J488
v.3



Digitized by the Internet Archive
in 2009 with funding from
Ontario Council of University Libraries

秋蟬吟館詩鈔卷三

上元金和亞匏

椒雨集下

雙拜岡紀戰

我過雙拜岡紅日漸西入一隊蜀郡軍赴戰意
甚急道旁皆狐疑相隨頓雲集前行未百步楚
士兵各執狙伺何人家環屋四邊立尚欲踰垣
看攀樹當梯級蜀軍自東來呵逐楚士開楚士
轉身鬪戰聲馳如雷大刀狂有風長稍疾於雨
雙拳鷹鵂獨脚象鼻吐貼地捷進獠衝天善

飛虎身挾車輪盤氣振屋瓦舞纔驚彼洞肩卻
是此斷股額批創更裹胸貫罵猶苦直似父母
讐豈但酒肉怒從來攻城時未見今日武雖各
數十人半里暗塵土觀者魂盡褫前揖敢笑阻
兩軍戰方酣一人怒馳馬竟從此門出瞬已到
山下楚士紛逐之譟語餓鴟啞馬上必蜀人楚
士所捉者蜀軍志擁護鴉散亦走野吾儕好選
事略息行人喧稍稍相問訊來窺此家門門中
一幼婦頰顏自呼冤我亦不必問汝亦不必言

將問

我何言問諸將諸將之來自 天上 帝視公
等何如人專閫半是熊羆臣相期併力殲黃巾
他年一閣圖麒麟公等伴賊八千里於古步步
綏當死軍興於今四年矣神州之兵死億萬以
罪以病不以戰大官之錢費無算公半私半賊
得半奏捷難爲睡後心籌糧幾奪民家爨今春
自楚東下時賊船如馬江頭馳頓軍何事來偏
遲坐令巖城入賊手五月不能攻下之公等尙
學飲醇相白頭老盡連營師 天語勿謂督責
寬雷霆只是駢誅難謂當補過桑榆晚酬 恩

不負登時壇昨聞北去賊中原數郡犯及今無
寸功罪狀誰末減君不見百戰百勝新息侯征
蠻到死譏逗留

兵問

兵來前吾問汝汝今從軍幾年所且不責汝無
事年年用國如山錢亦不責汝近年事事
事弓刀盡兒戲只汝出門時汝家復有誰若父
若母若汝妻若兄若弟若汝兒骨肉哭路歧不
能親相隨旁觀代銜悲祝汝歸無遲自從送汝
後竟無見汝期古人亦有言生死半信疑何知

汝身在身在心死久煙牀鳩毒甘博局梟采負
帳下畜村童路上詵村婦村民米與衣結隊惡
聲取縱免將軍誅可告汝家否汝家儻聞知念
汝罪難赦老者愁可死少者悔可嫁壯者欲汝
囚幼者亦汝罵汝或猶有心不淚當汗下計汝
惟一戰功罪在反掌豈但慰汝家報國受上
賞君不見中興第一韓良臣本是軍門舞槊人

雙將行

如我語語謝將軍將軍何以威名聞賊不敢割
鍾山雲鍾山在東營最後西前一營倚山右逼

賊一里與賊守其將白面二十餘一槊殺賊賊
不如賊以千刀來一槊已入刀中呼賊以萬火
來一槊已出火前趨賊懼賊且退一槊闌賊當
溝渠賊敗賊乞命一槊驅賊如羊豬東城之賊
夜不眠由來軍中有一全

參將名
玉貴

更結一營鍾

山南但願賊至戰便酣其將短身近三十兩刀
飛舞對賊立開門延賊賊不入出門挑賊賊不
集捉刀稍前賊走急賊走未步刀已及刀旁衆
賊環而泣但聞刀聲風習習不知所殺若干級
衣上半邊人血溼南城之賊塵不揚由來軍中

有一張

都司名國樑

軍聲仗此二人在鍾山尙在桃

源外將軍無言坐帳內

全君者黔人起卒伍在楚南有禽僞王子功

甲寅春已官總兵奉

命佐和

春

督師攻廬

州君至則當賊而營戰甚力其六月督骨傷

於礮經數醫鐵丸不得出憤極創潰卒張君

者字殿臣粵人自賊中來歸今已積功至提

督幫辦軍務方全君之去江寧向

榮

督師指

臂惟君一人而已三年以來賊狼衝不突致

君奔命不遑雖積有威聲所向披靡然循江

上下南北人皆待命於君則君亦勞矣今年

五月鍾山之潰君適逐賊溧陽

或云在六合

聞而

馳歸衛督師東下止於丹陽督師旋以憂死
時賊勢方盛分數道竝進君以死力走之嘗
於一日夜來往三百里內各與賊戰戰比勝
他軍亦數萬君所不至無敢戰者苟非君一
人搢柱砥隕則常州以下東南郡邑事未可
知焉他日吳中尸祝之報竊以爲不在向督
師而在君也

丙辰八月補識

鄰婦悲

時復寓鍾山南二里之村民劉氏

還家不得處寄居非家時涼雨睡未起但聞鄰婦悲鄰婦作何語一家十三人中春纔幾日盡死餘一身此禍何自起起自賊至夜夜半聞刀聲走避北山下遠投山下村村中阿姊家自然驚失魂隨風播在沙風沙將魂去老幼一時病舅姑年最高先後遂竝命夫婿及小郎未嫁阿妹三比肩小男女四女纔一男此病死略同彼病死不異朝死棺未封夕死棺又至官軍駐鍾山四月歸家來生者尙何人一女唬母懷頃者天大暑此女復病死生者尙何人屋內一身矣

如何乞醫藥死者未死前死者既死後如何償
葬錢惟有一塊田亂時向誰賣賣後衣食難但
恨一身在一身豈免死死胡獨後期一身豈惜
死死更無人知人閒人不知鬼路鬼自熟只願
作鬼安不願作人哭不願作人哭哭聲已不支
問答有老翁欲慰難爲辭鄰婦如此悲所以摧
心肝我非鄰婦悲何以眼鼻酸

見彗

七月初八夜戌亥之間見西方白
後日早半刻至八月初遂不見

半輪秋月外頓見一星長直與繩同體明如燭
有芒衆心雜驚喜

或謂彗見是賊方盛時或謂
彗見則賊滅是二說者余皆

未敢知也余說只尋常彗自經天走西人論已詳余於天文無所知惟古以彗占驗者亦不必盡合嘗見西洋人謂彗星非一若以往事推之其周天也亦約略可得其年歲如道光五年所見之彗至道光三十二年間當復見今則正其時矣西洋人之言天文未免與王荊公同病然其所見之年歲能預言之恐亦未可厚非耳以俟博雅君子教我焉

將渡江之全椒作書寄母

入秋已一月別母今幾時母之命兒行謂獻軍門奇百謀不一合前事母盡知近來寄人食十日常五飢身上衣綉單涼風作聲吹前者瘧又發熱甚體頗羸牀頭無一錢村中亦少醫全椒

言三
舅若姊書已三回馳召兒居全椒今日兒難辭
當兒出城來萬慮不到斯一城尙隔絕渡江況
遠離束髮受書初侍母鐙下帷母言教兒勞翻
祝科名遲常常依膝前負米底不怡讀經至盲
左包胥退吳師小子沈后臧入吳與母隨一旦
自歸楚棄母甘如遺葉公不正視兄弟生鄙夷
論史至典午劉琨急義旗奉表命太真母裾絕
臨歧既去并州鄉身遂東南羈功雖敵士行天
性識者疑母輒呼兒前母效若所爲所爲非人
情不念生平慈兒亦跪白母但效萊綵嬉似此

忘親恩豈不根本虧何圖夙所貶一一兒蹈之
母猶寄賊中兒竟遊天涯母今病若何賊是無
行期何年面重見何月手復持何日聲相聞何
時淚對垂兒縱得長生白髮卧者誰作書忍辭
母強顏述愁眉雖多慰藉語大要同面欺遙想
母見書絕無責兒詞責兒兒已遠惟有長相思
相思願兒健仍似從前癡癡極思更苦定復悲
不支悲時孰勸母當未生此兒果未生此兒尙
無此日悲

曉發

單車碾殘月村巷答雞聲花露逼人冷葛衣如
紙輕江空催曙色山瘳讓秋晴親舍日趨遠白
雲何處生

抵全椒

余生於全椒九歲歸江甯今二十有八年矣

襄水重來老大身兒時井里認難真誰知竹馬
看花地今作池魚避火人以後生年原幸草無
多客路已勞薪望門隨處欣桑宿甥舅爭先話
苦辛

到全椒後徧飲諸親友家

乞食居然似壯遊到來宵燭總句留羞談軍事

同胡賈愛問鄉音又楚囚

諸親友家頗有酒力
江甯人寄居者

能除兼月病蟲聲不改故山秋人前彊道思親
苦豈抵重幃老淚流

聞落葉聲有感

夜夜空階落葉橫因風隨處答蟲鳴紙窗如墨
每疑雨華髮成絲是此聲蘭芷江邊遷客淚靡
蕪山下故人情飄零自分無歸日略向歧途訴
不平

呈從舅吳築居先生

我生方八歲全家寄舅居深深修竹中許借聽

雨廬阿舅纔中年仗筆爲農鋤遠作珠履賓歸

已逼歲除劇與我父飲到鼓一中餘我幼何所

知階前鳴輕琚阿舅月旦寬道甥器璠璣其時

浩然師

即先生弟余第六舅也

下帷治經畬我母屬多病

命兒就受書讀了不異人蠢蠢奴牧豬不過問

字勤朝至髮未梳宵雪侍披吟免觸屏風呿阿

士無文章何以當過譽明年還江南行及燒燈

初阿舅惜甥去門前送登車諄諄語我母長路

毋苦渠別舅從此始見舅日以疏惟當試秋闈

阿舅來自滁一月金陵城我母接笑吟謂舅非

外人食恆糲與蔬舅必叩甥學陳編孰獵漁我
敬前請益常得疑團祛後來舅漸老名場厭齟
齬忙槐意常慵罷券博士驢我尤負舅望少壯
成棄樛碌碌局轅下足不出里閭我母況更衰
家乏升斗儲寒氈急甘脆塵務漸紛拏地雖百
里近欲行仍姑徐與舅遂隔絕似限參辰墟前
年吾師亡會喪豈躊躇適我疴甚危天末哀空
茹遙知阿舅痛一翼忽折鷁鼓琴失舊曲老淚
常溼祛我母每念舅案日意不舒詎乏尺素通
情話難畢臚今來投舅家叩門自愁余長身賸

骨在瘦影疑山魑面目黑且醜蓬髮森拼欄回首三十春如瞬馳居諸何知拜舅時乃作逃網魚阿舅幸尙健教甥停欵歔薄田歲有收不愁甥食糲爲縫秋衣裳且脫六尺練舊時我居屋百花香露滑大好尋鶴夢月地魂蘧蘧所恨行過處久哭絳帳虛阿舅待甥厚敢辭春風噓眼前母家人日日歡相於我母卧圍城舅謂悲何如

馬總戎龍卒於軍弔之

若論江南將如君頗不多志難忘墮甌語必到

揮戈獨戰能行否無醫奈病何別時珍重意今日爲悲歌

九月九日

登樓忍餞素秋殘尙有清明淚未乾敢望菊開容手把但聞萱好亦心寬愁多自厭鴉聲亂別久方知馬角難等在山城風雨節衆中我獨不勝寒

上海城陷縣令袁君

祖惠

死之

其賊魁曰小金子前

已爲袁君所獲而未殺至是竟爲所害

屠伯原非治行宜奈他觀釁輟耕時效尤竟敢

欺強弩用猛何傷斬亂絲一命貸狼搖尾易萬
聲讎鳳噬臍遲盤根錯節今都是寄語龔黃早
主持

宴築居舅小園坐上諸君皆有贈詩賦酬
過江原似故山行卻戀南雲夢不成許我看花
先蓄淚對人把酒且吞聲胸如冰塊因誰熱髮
有霜華早自驚青眼未須頻屬望飄萍從此是
餘生

過吳氏園本余外祖家園也今別歸一吳
氏其後樓爲余初生處

一樓燈火半河濱

地名半邊河

曾此曉聲夜惱鄰翦

燭尙留垂老客

有先君子舊好二人尙能識余

覓環已似再

生人滿栽黃菊都新樣還倚青松亦夙因豈獨傷心慚宅相眼前誰是舊家親

過達園廢址弔吳山尊先生

先生駕鶴三十年在何洲島爲仙人閒遺下
好樓閣回頭一夢成雲煙想因圖畫似天上不
教久落緇塵邊斯園四美我曾見先人舊宅園
東面締交夙證雷陳盟結鄰晚遂羊求願其時
先生方棄官謝逋招隱還名山

謝逋招隱賣賦買山先生園門

聯也種樹眼前名節表藏書身後子孫看不須金
谷豪絲竹何事平泉珍草木先生自構將就文
外人早羨瑯嬛福胸無萬卷通人才談何容易
停車來題襟不問草元字秉燭難登文選臺酒
非三盃驚人量亦莫輕來此堂上鎖門投轄嘉
威侯廣座傾尊北海相別有生平廣厦恩更令
海內仰龍門但聽平津賓客語都識洛陽錦繡
春我年太小纔勝衣學書尙恐辛羊非偶從先
人拜山斗舉頭四壁香塵飛不知林壑是何物
臨行但乞花枝歸一自先生埋玉樹先人亦返

金陵住望裏還知星聚堂長成尙記鶯曉路漸
有人傳水石差漸聞人說散煙霞紅蕉栽入衙
官屋么鳳分棲駟僧家我猶未信無椽瓦大抵
蓬蒿徧階下徐鉉故園今賣茶李靖荒祠誰養
馬今來頻過小橋旁不見藤蘿一寸牆半里寒
流戀荒徑四邊衰草占斜陽零星略有幾拳石
黃葉疏林不成色石下宵眠守菜傭林外朝逢
掃薪客園名徧有路人知我況先人杖履隨若
說蘭亭觴咏事要似西州痛哭時

先生於余亦
得爲舅家

當日斯園月與風尙在誰家詩卷中海上從來

多蜚氣南陽沁水千秋同先生雲際定含笑不
用招魂向碧空

贈滁州張瑾山

瑜

結客無家日先嫌衆裏身吹簫當末路傾蓋得
斯人酒好休辭病詩多不計貧桃源何處是可
許結比鄰

君先賊未至自滁州遷
全椒近又將遷居遠鄉

拜舅氏吳履吉先生墓四十韻

先生諱坦
以諸生終

無子惟一女適楊氏即今余所寓也
余幼時寄居全椒受外家恩尤多

山色瘦蘼蕩溪芳寒著茭爲尋蠅弔冢遠至雁
鳴郊懷舊銘剡蘚銜哀坐藉茅請從西景睨與

奏北聲脩姓望唐韋杜儒修漢服包酒兵誰敵

虎文伯此騰蛟熱手羞因竈閒身老繫匏平生

千卷業流輩幾人交神促乖龍夢

先生卒於辰年

兒遲

綵鳳胞遺珠一星小埋玉九泉劫長夜今尤駛

餘田孰守境

墓旁本先生田今已歸他氏

只添秋草宿難免

惡塵淆陳壙妖狐搯荒溝狡兔跑野燎焚宰木

鄰糞漚淫胥雨潤耕偷墜冰乾獵趁罟村尤肯

呵護山鬼亦欺呶不信藏魂魄由來等影泡紙

錢慳蜨舞麥飯斷鴉捎棄豈參軍忍悲胡太傅

教若令餒眞苦未必恨全拋昔我生初歲寒家

言三
旅寄巢母懷剛學語舅膝每編髻賜果調行急
分花祝醲姣替支歌踴踖故試字礪礪肩絹容
塗墨琴絃聽放膠風神江最賞月旦阮何謝慨
自門停鵬愁過室網蛸詩無元禮說書尙涅陽
鈔九載甥依甯三春客渡灤兒時恩竟負天外
首空抓欲訪齊蒿里還陳楚蕙肴有心澆趙土
何日返秦嶺昨以鳥遭繼新爲魚避翼此鄉桑
宿蔭華屋竹看苞殷帳燭曾翦謝庭棋罷敲慘
從橋墓祭敬代鄭孫庖
先生沒後十餘年始嗣
一族孫在遠鄉亦不能
祭時至掃病蟀驚蓬末饑鷹瞰樹梢喧闐逢社鼓髣

髯過雲旂敢謂靈招鶴聊當淚制鮫芙蓉城在
望歸慰蔡家嬖

聞江寧婦女有出城者

十月之後賊許婦女出城采薪乃有

逃者自賊婦官至村民至我兵以次賂之事可不敗然吾母卧病之人則無如何也天之酷余甚矣實余不足以及回天俾母病早愈耳

天遣春柴老人欣夜網開但令金有用不至命
難回獨我臨風望遙知伏枕哀筍輿猶未可況
得杖聲來

哭湘帆戶部二首

有序

君名壽昌滿洲鑲黃旗人世駐防江寧

君以道光乙未舉鄉試一上春官未第
適改駐防人鄉會試例用 國書非君
所習驟學之不能盡其奧遂無聞達志
吳縣馮景亭先生來主惜陰書院講席
奇君才時駐防人官京師者仍得如京
旗人與漢試先生赴官 京師與君乙
未座主今相國卓公謀乃囑君納粟得
小京職駐防將軍不聽行督部陸公力
主之君始就部爲散員得與會試以道
光三十年成進士改庶吉士咸豐壬子

散館又改主事君仍鬱鬱不自得君體
素羸自入京師益常常病今年之春
聞賊趨江寧走健僕來迎母夫人及妻
與子未至而江寧陷家羈賊中不得出
君病遂篤四月卒君博研諸經尤善言
說文假借學所著書皆未成惟夏小正
疏證聞已具橐文入南朝人室詩宗蘇
長公本朝滿洲人之文章經濟多有
遠勝前朝者而江寧駐防中則如君者
實從前未有君與余及蔡君紫函

琳孫

言三
君澄之

文川

交最密余於十月在全椒

始聞君逝驚逸之魂才力愈荼蓋未足以輓君聊存短奏用塞悲耳

春風容易替回寒如此招魂底用官 帝里傳人伊古重江東才子到君難名山有約分金饋滄海無情降玉棺幾輩天涯同志在一時都恐淚珠乾

半爲干戈阻石城青春有夢總鶻聲全家尙在亂時過一命先從愁處行他日誰猶問遺橐斯人天竟肯虛生長安煙火非君福不但玲瓏病

骨輕

寫在營諸詩示客題紙尾

筆端何事好譏彈公是公非欲掩難尙忍百分
爲^借國諱敢誣一字與人看歌行未必當呼史
笑罵由來自作官論著潛夫詩歇後我今膽大
署從寬

江寧糧臺爲兵所掠

如何平到有風波減斛量沙竟反戈若輩狼心
誅自快諸君象齒計終苛寄家方恨黃金貴到
枕誰知白刃多此夜萬聲燈火裏不知村井幾

驚訛

北警有作

此賊江南守城賊江南欲戰戰不得料無人奪
江南城分走中原到天北遷延竟作至尊憂
此日羽書馳帝州此日江南寒漸甚諸公無
事正輕裘

祁兒生日枕上作

七年前汝此時生夜雪初停雞正鳴今夜雞鳴
聽殘雪枕邊只少汝唬聲

詩卷零星付汝收睡時夜夜閣牀頭如今定在

灰塵裏此事思量淚也流

校吳次山先生遺橐

悲來欲酹五千卮恨不留君到此時河北陳琳
先氣短江南庾信太聲雌本無枯樹驚人賦竟
有韓陵共語碑第一羈棲眞快事擁衾苦校故
人詩

出門

寒衾負獨眠遲起尙云早冒雪叩人門不信貌
枯槁誰知黃塵中午飯炊已好主賓虛左留豈
類亭長媼長揖從此辭乞食亦有道

言三
小飲呈築居舅氏

寒花拂檻酒盈卮都是辛酸欲淚時
芒刺繞腸無著處苦吟夜夜不成詩

歲暮

暮天霜氣慘斜曛寒到羈人更十分
欲訪梅花吟卻嬾未嘗椒酒意先醺
經秋僵蟪羞遲死盼曉飢烏悔失羣
家信萬金無一字長江百里斷知聞

落花生三十韻

甚欲藏先敗萍雖化亦凡未聞珍果
飮乃自落

花銜涸海潛消鹵童山廣鑿嶢田難宜我稼種
別乞仙函方夏靈根孕延秋怒蔓髟葉圓貪欲
露茗曲巧攀巖星蘂黃欺宿雲絲綠借杉無聲
金暗墮有味玉初絨香永從教冶團焦詎用監
含辛蟲不蠹埋秀鳥奚鷗霜重晨收芋冰乾暮
伐攬貨防真棄地人競遠攜鑿藤朽蘿剛縛麤
繁豆敢芟披沙和草掬篩鐵恐泥攬珠串多連
貫銀丸或獨嵌寸疑蔥樣斷皺孰棗紋劉折處
腰憐痠拈時手稱摻呪瓊拋素粒吹絮解緋衫
糖裏翻嫌潤鹽霏略配鹹分甘兒拾慧下酒客

除饒販粟來塵轂包蒲趁估帆每迎新歲早如
累左高咸水戒當風漬霉愁漏雪賦論錢輸錦
市饋橘此瑤械況此冬心畜關民日用暑醪油
肥當彘烹飯飽呼麇粵野忠思獻齊農笑更炊
底尋芳譜載似鄙小言拈樞許書功竝瓜還禁
食嚴長生名可妄醫術問天譴

枕上

孤鴻唳處柝沈沈病有真魔睡敢侵鐵縱鑄成
都錯字桐經燒後是焦琴鐙昏不照吞聲淚酒
熱難澆忍死心籬寄也愁風鶴警由來我本是

驚禽

時廬肥亦陷於賊椒邑頗警

漫作

人說殘年盡余愁此夜長由來微醉後無夢不
還鄉家信隔江水春歸更斷腸鐙昏了無燄欲
睡幾商量

除夕與楊君儀吉家宴

依君五月忘飢寒今日宴我徒悲酸君翁白首
兒束髮大家燭影紅團團杯斝獨勸座上客到
此能醉無心肝感君情深拜君賜忍淚不流聲
彊歡

除夕又作

遙知姑與婦今夕睡尤難
粥椀和冰薄絮衾經雪單
相看惟涕淚不惜忍飢寒
應更憐逋客一枝何處安

甲寅元旦聞鴉

村樹惟棲鴉向曙鳴最早
鄉夢徒荒唐累汝報春曉
俗耳無鍼砭每爲惡聲惱
我謂汝能言畢竟勝凡鳥
九閭夜沈時啞鳳知多少
但有臨別辭緘口世所寶
他日汝東行慎哉好音好

吳漢西

金署

表兄以正月四日與邑中諸

名士遊程氏園林得聯句十四韻明日
見示索和余用其韻得四百二十言奉

酬兼示諸君子

新年俗所尙聚歡紛雜哢入市輸金錢翦綵矜
春釭夜燕爇高燭鉦鼓喧擊拊或招羣少年梟
雉喝不降何異兒童嬉拋壻而緣撞諸君非其
倫閉戶酒一釭乘興偶尋幽勝侶奚寡雙雖無
鸞控車不用驄繫椿雖無海人槎不費吳孃艤
蠟屐平生蹤行行渡漁疇梅信有人家新香姑
射婉叩門忘主賓席地憩勞躩是時雪初霽斜

日紅半窗坐談松濤邊輕風時琤琤溪流帶冰
聲石上鳴淙淙塵夢欣遊仙直至天色黧茶力
逼酒消八斗才同扛作詩印鴻泥字字吹鐵腔
歸來不厭晚新月剛垂杠詰朝寫示我氣結徒
眈眈清福獨我慳莫振聾與眈一世黃埃多坦
途亦巖崿況我遭亂離脫身從戈鏃忍死背鄉
井幸託甥舅邦此邦亦風鶴日日心鹿撞驚弓
鳥之孽彌覺寒戰慄敢云乞食樂遂若佛卓幢
儻復志名利死真諡駭愈安得武陵源地可承
耕耒我欲偕諸君追陪足音楚其間有佳趣古

風尤敦龐人皆老不死髮禿眉且龐春酒廣種
秫冬粥兼藝豷先人安墳墓何必阡表瀧子孫
不讀書恆農性乃恹山鬼餉蘿荔游女秉蕓茫
病餘自采藥每得芝苓邋居然天上人雅馴及
雞尤不遣青鳥使誰馳萬里駒不許桃花飛誰
挂三春籊斯境徒妄想我心繫南江薄醉聊呻
吟哀音答村柳

送瑾山移居花山

一度別君如一歲相思夜夜定同心尋常得見
尙如此況君入山今更深自有桃花供嘯傲可

言三
憐萍梗只浮沈何當盡脫春衣典多買村醪細
酌斟

全椒南郊晚步

書聲琅琅梅花香一時吹送春風忙知有人家
不知處山雲溪水天茫茫燒火難灰草心綠夕
陽漸放人影長獨步五里不忍去半身新月山
昏黃

江寧死事詩十四首

江寧布政使司祁公

宿藻

公字幼章

山西壽陽人進士自壬子之冬督師陸

公赴楚城防之事公以一人任之逮賊
之至公力已瘁癸丑正月二十九日賊
既圍城公登城厲衆固請啟城一戰督
師及駐防將軍宗室祥厚總理籌防前
廣西巡撫鄒鳴鶴皆不許然其時城中
固無兵矣公憤甚歸即歐血數斗是夜
卒公之初視政也策書院諸生以金陵
利弊問余對獨言兵公甚韙之蓋至是
公未嘗不悔兵之不早集也

忍見環城賊英魂上訴天是真身報 國不在

戰功傳未事柯先假能軍瓦或全書生知此意
血色定千年

欽差大臣兩江總督陸公

建瀛

公字立

夫湖北沔陽人進士公受命督師在壬
子之十有一月江南諸道夙所稱爲勁
旅者先已調遣略盡公僅率吳淞罷卒
二千人以行時賊方陷武昌挾衆東下
上流亦未聞有撓寔之者而公獨迎賊
而戰軍於湖北之武穴既戰大潰還江
寧不二十日而賊至公守陴十日瘠甚

二月初十日平明時聞儀鳳門壞儀鳳門北門也公時在南門急率裨將數人往先過東門請駐防將軍兵爲援行未至北門而賊自他城登者已走及小校場與公值公督裨將巷戰遂遇害副將佛爾國春從公死公之潰武峽而歸也濱江各大吏之防禦如何賊何以能速來江寧其上流之軍皆與賊自粵楚相先後而下者犯江之役何以尾賊獨遲其情事非隅見所能詳則公之功罪亦

容有吾輩所不能言者至於城陷之日
公實首殉之既彰彰在人耳目而專仇
公者或有他論則不敢與聞矣

羣醫同釀病俞扁尙難回孤軍況羸者深入能
戰哉矢忠房太尉鼓謗石邛峽地下鬼雄在應
呼殺賊來

上元縣知縣劉君

同纓

君字清溪江

西新建人拔貢生城防之役自方伯祁
公外無勤如君者當儀鳳門初壞時君
督城上軍以空櫬實土復索米囊立築

之初十夜尙率勇士數十人閒行移步
政司庫銀數十萬於縣庫中志在戰城
內賊也十一夜駐防兵盡敗沒君乃走
出明日赴縣治後龍王廟前潭水死說
者或謂賊入城後知君能欲降君以一
黃旗畀君走君乃以劍自剄非事實也
時江寧縣令張君行澍字海門者於督
師殉城時奔告君出即赴四象橋西河
水死亦所謂衆見共聞者而事後多謂
其未死則眞愛憎之口矣故附表之

得君十數輩辦賊亦何難未死心猶壯多勞膽
早寒補天資片石埋地贖狂瀾豈有豺狼性車
前拜好官

上元縣學教諭夏先生

慶保

先生字

履祥儀徵人舉人城陷日四學師皆散

走

江寧省城凡六學時府學訓導武進
歐陽先生晉守城死惜不得其事實

先生獨止其廨命役市阿芙蓉膏不可
得盡以所畜十五金授其役曰我死以
此市薄棺掩我尸餘則餉汝慎勿救我
役諾之乃懷印而縊而役已呼他人救

之矣先生恚甚其廨之旁有吳生者謂
先生學師不殉城可無罪請父先生彊
先生居其家約乘閒奉先生逃先生持
不可方勸勉閒賊已至詰先生何人先
生曰吾官也探以印提賊賊刃擬先生
先生大唾罵遂遇害

先生平日志兩字盡人師大暮方含笑旁觀自
述悲十年真冷宦無飯活妻兒若果作斯想難
爲飲刃時

守四方城淮安兵 淮安兵者漕運總

督標下兵也調守江寧者凡二百人儀鳳門初壞時諸城駐防兵聞之先退守內城新募兵萬餘人亦隨之而散賊乃得由清涼門及矮城緣梯上惟淮安兵仍守四方城不去四方城者南迤東之城角也故名地非賊所必經然賊欲速下城則往往經此淮安兵皆殊死戰自晡時至夜將半已殺賊無算既而火藥器爲賊鳥鎗所中火大發衆稍稍卻遂敗於賊二百人僅有存者

諸君亦癡甚奈此一隅何已啟連城鑰徒麾落
日戈從軍家食久許國死心多安得淮陰士
當時四面歌

滿洲全城男婦駐防兵既退守內城
初十日昏時諸外城已無守者居民亦
皆閉戶矣賊乃聚攻內城內城雖婦人
童子能戰者無不致死力凡戰城下一
日夜賊之死者蓋已萬餘而賊至愈衆
內城乃破自將軍以下至與戰男婦皆
死之賊遂屠其餘得免者數百人而已

一人都一戰到死氣如雷不殺萬家盡巖城未
可開頗褫魑魅魄拌築髑髏臺斯壯 帝鄉色
鵙鵙夜莫哀

前浙江副將世襲雲騎尉湯君

貽汾

君字雨生武進人祖父皆死臺灣難者
君用廕生官至副將軍以詩酒罷官歸
寓居江寧城陷日君賦詩一章自縊死
先是君營別業於冶城山下晉卞忠貞
公墓旁卞氏子孫訟君侵墓域君挾當
道力不爲屈至是君亦殉賊難然則君

固卞夫人所謂忠孝中人也其於卞公
必有相說以解者故篇終及之

君豈能無死家風帝所庸賦詩完結習難得是
從容真氣定常在西山最上峯卞公忠孝者今
後儻過從

前山西忻州知州曹君

森

封工部主

事胡君

沛

曹君字寶書上元人進士

起家縣令官至刺史

予告歸胡君字

燮園江寧人貢生晚受從子主事封

城陷日皆衣冠自縊死

儘許商量活高年一命輕承 恩周命士守節
漢經生鬼趣甘泉壤人倫重姓名兩君何可少
纔不愧簪纓

諸生王君

金洛

君字蔗鄉上元人君

好談兵方賊未至二十日方伯祁公屬
君募鄉兵練之倚君甚重君亦慷慨自
期許兵未集而賊已至矣城陷日君預
懷大石洞重門待賊先一賊至君殺之
繼一賊至君又殺之繼數賊至君舉所
殺二賊首示之賊前擊君君走後戶赴

水死君平日勇於作爲不知君者有周
孝侯之疑篇終云云惜之乎白之也

縱使君專閫兵機未可知才雖勝處障事已等
輸棊即此磔梟首居然留豹皮蓋棺斯論定畢
竟烈男兒

機匠父子 機匠某者居西南城隅下

浮橋右委巷中與三子皆絕有力賊初
入城比戶括財物苟屋非甚華啟則入
閉則去於是居人皆閉戶匠戶獨啟坐
候賊其室僅三間各以一子主之置刀

杖屨處賊衆至者則偃僂肅送迎賊見其無長物輒棄去賊若三二人或一人至則必止賊過其家賊才入即鍵戶而守諸子視賊所至室執而殺之於後圃埋荆棘中既埋賊復啟戶如是者十數日所殺賊將百其繼也鄰有老婦人忽戒一賊毋過其家事遂露羣賊夜來圍之與二子皆鬪死惟中子得脫此余癸丑五月聞之於橫山村民蓋亦爲機匠城中去所居非遠嘗親見其殺賊者說

時略述其姓名今余忘之矣

健兒終并命彼婦竟何心魂魄或無恨生存已
到今大家都敢死何賊不成禽十日磨刀慶中
庭殺氣沈

青溪妓 青溪妓者其姓名傳者異詞
姑闕疑賊既圍城諸妓樓皆早徙此妓
獨留城陷後一賊入其家知爲妓欲犯
之妓不許賊將逼之妓甘言緩賊去爲
窮袴裝赴水死

豈可滔天寇而容近妾身半生爲蕩婦自古有

波臣縱欲移家去春城總惡塵此時心事苦吾輩又何人

武昌女子 武昌女子者在賊中姓名爲朱九妹然真僞未可知其全家爲賊所驅自湖北移江寧癸丑之冬僞東王欲納之僞東王固賊魁也女欣然入賊王宮宴驩甚女潛置毒藥於酒若食中進賊王持之急爲賊所察立磔死於是賊選色之令遂弛焉

此亦霹靂手何妨見色身不聞教坊曲猶唱費

宮人事豈論成敗天宜鑒笑顰餘威賊膽碎兒
女受恩真

張了頭 張了頭者里巷習拳勇之民
世所稱爲無賴子也城陷後浮沈賊中
近一年能終不爲賊所得蓋其智有過
人者甲寅二月張君炳垣既與外兵成
謀計非有勇士不能斬關迎外兵或舉
張於張君張君使人說之張不可曰張
君知我必自請我乃爲知我者死耳張
君聞之即日過張張大喜許之至期張

袖大刀夜至神策門盡殺守門賊二三十人候外兵外兵迄不至張遂惘惘歸既而賊推殺人者甚急適張君事已露有知張附張君者白諸賊賊乃捕得張張呼賊速殺遂先張君死先是有倪了頭者亦以無賴稱於賊陷城日凡賊獨行委巷中倪伺左右無人即袖出刀殺之凡殺七八賊賊終不得主名後不知所往與張爲二人邪抑即張而傳者倪其姓邪故附表之

纔知刀有用熱血滿身歸殺賊心原在收城計
已非三軍常健忘一載只長圍值得酬知己江
東賤布衣

諸生張君

繼賡

君字炳垣上元人自

圍城時君與當事謀所以守禦者甚備
事不必盡得行行亦不必及於事城即
陷君即日變姓名屬僞北王僞北王亦
賊魁也所私屬凡數千人君察其解事
者時時說以大義竝陳利害誡之則皆
色然動君知其可用乃與鄉人謀之各

以其親知從一時之潛結者半於城於是楚北人爲賊脅者聞君事皆爭先附君雖楚南粵西人亦往往而至君部署略定癸丑八月遂以五千人名上諸向督師願應外兵督師喜所以嘉許者逾常格既與之約皆失期爲督師謀者欲自飾其諉也且多方誤君城中人皆咎君語不誠稍稍散而君時時往來督師營受賊譏察亦數瀕於敗蓋至甲寅正月而君力已憊然君之衆猶千有餘人

乃約二月五日殺神策門守賊納外兵
外兵未赴以雨辭張了頭死焉而君之
事先露矣賊收君窮君黨刑毒非人理
君與賊游久凡賊之勦勅能爲賊出死
力者君皆知之君輒受一刑畢則曰吾
黨夥汝以冊來吾徵汝則出冊君以筆
志其名賊即駢戮之十日中凡死四百
餘人皆昔之勦勅能爲賊出死力者也
於是賊之驍大損賊亦悟惟苦君令言
楚北及江寧人君遂無語餓已死賊輟

君尸故凡與君同謀者皆得逸出於是
無應外兵者矣嗚呼君之死也最後而
君之死也亦獨慘余特以君殿焉癸丑
十一月余聞君與營中往來自全椒急
馳書緩之蓋余留營中幾一月有以慮
其事之必不成矣惜乎君意方銳也

萬戶侯相待原拌七尺軀鬼都瞋賊酷我敢哭
君愚黑海橫流是青天醒日無連營消遣過苦
費大聲呼

江寧之陷也在事文武專防守責者前後各

殉其事蓋未聞有爲賊得者即閒散需次諸
君亦往往勇於授命至於兵士之喪元又意
中事矣其城中僑居土著之戶自薦紳以至
齊民城陷時倉卒爲賊戕者城陷之後縊者
溺者焚者鳩者或老弱同歸或死亡略盡鬼
錄所登殆不可以千萬計至一年以來孰者
以謀遁洩語孰者以文字挑釁孰者以他事
株連其見殺於賊者又若而人苟言其義憤
則從同而概爲表揚則反漏他日公私祠祀
俎豆千春必有總其成數以爲一書者吾所

謳吟今姑舍是固非有所愛憎恩怨於其閒

甲寅三月識

是卷半同日記不足言詩如以詩論之則軍中
諸作語宗痛快已失古人敦厚之風猶非近賢
排調之旨其在今日諸公有是韜鈴斯吾輩有
此翰墨塵穢略相等殆亦氣數使然邪若傳之
後人其疑焉者將謂醜詆不堪殆難傳信即或
總其前後讀而諒之亦覺申申詈人大傷雅道
然則余此詩之得罪多矣頃者江湖遊食更無
執廡下人問五噫歌者殘秋無事以其爲昔年
屐齒所在故仍端錄一本存諸篋中聊自娛悅
不但無問世之意亦竝無示客之時侘日齒邁

氣醇或復以此爲少作而悔之又不但去其泰
甚已也丙辰九月自跋於松江寓樓

秋蟬吟館詩鈔卷三終

秋蟪吟館詩鈔卷四

上元金和亞匏

殘冷集

余以甲寅八月出館泰州乙卯移清河丙辰移松江數爲人師自愧無狀惟以詞賦爲名於詩不得不間有所作雖短章塞責而了了萍蹤未忍竟棄遂積爲卷葉此三年中乞食則同也而殘盃冷炙今年爲甚夫殘冷宜未有如余詩者矣乃寫自甲寅八月至丙辰十月去松江時詩凡百有餘

首命之曰殘冷集

甲寅八月自湖熟移家至全椒十六韻

全家今四口九死一生餘半載棲村落秋深不
可居海隅將乞食汝輩復何如惟有椒陵戚時
時尙寄書尙能容客戶行矣雁鳴初身外無長
物單衾裹敗絮輕擔煩老婢妻女共柴車塵步
余尤苦隨人偶劣驢過江三百里喜趁估舟虛
偏值連天雨空山斷米蔬幾回貪賤價不飯飽
羹魚直泝西流盡斜陽指舊墟依依甥舅舍情
話重褰裾爲我籌風雪居然賃敝廬寒衣縫上

褚到臘夜春儲還是慈親澤低眉痛暗茹

過揚州

殘樓破堞暮鴉愁爾許煙花醉夢休月色照人

從此少劍塵埋地問誰收

賊去後書籍寶玉遺棄滿道中頗有希世

之珍而為不知者所得賣之既無善價遂往往損失

無邊海水添鹽竈

淮

南鹽法幾廢而鹽則甚賤

幾日城居又茗甌

城中賣茶者又幾千百家矣

莫把喧聲巢幕事浪傳消息到瓜州

瓜州尚為賊據

落葉和陸子岷

鍾江

子岷為立夫師次子時方寄居泰州之姜堰

館余於家

秋老江南逝水深拈花證果事銷沈可知駐馬

躊躇客自感青青舊日陰

冬筍二十韻

蓼荒葵老後胎筍又三冬竹已銜霜醉苔還碾
雪封暗中鞭自長迸處土難容田壁深埋璞沙
錐短露鋒芳根應伏齟病籜那成龍進飯憎壘
臼迎暄命菜傭梅鋤和月借菊棱趁泥淞拳曲
貓頭覓彎環鹿角逢笏光新蠟沐綳樣薄綃縫
銀管留纖穎銖衣褪內重切來雲絮軟點到水
花穠踞竈饒涎溢堆盤煖玉供無聲冰乍破如
屑粉初鎔清極膏嫌膩甘餘酒讓醲其香經宿

飽有味比春鬆凍縮佳人指陽回太守胸班羅
寒谷早禪趣冷時濃篝火燒尤便衝風呪肯慵
豈須談合浦休便笑吳儂不忍輕投箸傷心獨
孟宗

落花生三首

旁諸側荔也尋常一樣瓊瑤滴滴漿剛被江南
人見慣可知身是返魂香

殘紅多少付銷沈浩劫埋香太不禁未必飄零
都有用土泥滋味怎甘心

聞說風沙徧海濱無言難道不傷春憑誰報我

花時節去作生前證果人

題漱浦舒伯魯

燾

郎中遺稿

崔盧門第稱狂歌何事傷心對綺羅漢室郎官
年最少長沙才子哭偏多綵毫竟耗愁中命金
榜除登死後科山館寒燈讀遺稿教人豪氣也
銷磨

晚渡邵伯湖

驅車晚至湖湖水千百頃不見水波興但見色
耿耿由來十日寒凍作冰湖整欲行終狐疑舍
車買釣艇柔艣難著力只以短篙打一打僅尺

餘船進與步等時復柄入鑿玉龍聲屢哽有如
玻瓈瓶因風斷寶綆又如梧桐錢帶露落金井
此時萬籟寂半月早當頂四邊老樹多冰上繪
春影其餘惟參斗直下寒芒挺霜華已暗生衣
縫溼如梗我從飄蓬來第一此奇景大聲將狂
呼聊用譟語請願得海上仙借我鍊藥鼎敲取
鐵與石煮作七椀茗或者天帝女乞我釀花癭
酌之成蜜醪痛飲博酩酊庶幾真味醲消我胸
骨鯁奇想殊不經登岸去已猛若許中流停清
趣十分領便從漁師眠今夜定不醒塵鞅汗未

乾何愁夢中冷

渡江投村舍宿

山色到江窮殘年此轉蓬路長貪落日野曠助
來風火外驚尤亂雲邊倦鳥空單車忘暮冷溪
樹月明中

曉發句容

侵晨十五里風猛稱微醺霜力能忘日煙光欲
趁雲澗冰添馬路戍火奪鴉羣山寺鐘聲徹下
方人未聞

過江浦

萬頃冰田簇麥芽故山遙見夕陽斜竹聲夾澗
葉如雨松影護隄霜尙花荒驛夜寒聞病馬空
天路直望歸鴉浮生已分長羈旅將到家時轉
憶家

晚經江浦西郊墻間作

若非萍梗客此地月誰看一歲四來往空林今
暮寒出門猶得飽行路敢言難故鬼渾相識挪
揄語不酸

全椒除夕有作

薄暮山城野祭多黃泉求食遠如何白楊衰草

江南路盡是無家鬼哭過

將以上元日成行有置酒留者即夕口占

傷心如我甚燈月底相干多事留行者深杯不肯闌漫言春色早爲惜客途難豈有桃花面容人淚眼看

余賃居在桃花塢椒陵一勝景也客或留余俟桃花開者

過六合時方禱雨

春麥半枯農欲死三年況未息干戈若傾過客傷心淚應比皇天一雨多

泰州道中有黃梅花一株余去年過此時已開今尙未落感而賦此

淺水疏籬不斷春絕無悲喜是花身與君別後
三千里不信請看衣上塵

得家信知林女尙在

別來學語始牙牙我爲餘生萬事差聞汝去年
歸逝水只今何處作孤花牽衣應謂他人父墮
地安知舊日家寫盡零丁唬盡血死前真有見
時邪

聞周氏姊村居窘甚

平生恩重勝同懷亂裏傷離淚未揩病久早驚
頭似鶴餓多今想骨如豺遙知獨力蘭羞薄豈

有餘生蔗境佳欲致一縑休道晚可憐萍梗阻
江淮

寄全椒汪赤城

煥

兼示諸君子四首

臨別飲君酒酒消常口香只今明月夜夜夢
還鄉此地皆塵土殘春半雨暘一枝無可寄檢
點舊時囊

已賃桃源住飢驅更出來我家門外樹遙想萬
花開君輩喧山屐居人幾酒杯狂吟紅燭底是
否憶傖才

北地原餘孽傳聞漸可平名王酬

聖慮南道

盼威聲狂寇何時死吾徒信再生廬淝幸安穩
魂夢近無驚

出門七十日此第二回書驛騎揮鞭到期君指
敝廬醉鄉數君子問訊更何如儻爲鶻嗥苦多
情或和余

秋舲移居泰州庭前有海棠一株身已半
枯殆百年物也其枯處復旁生一枝與
舊株相抱作花甚繁秋舲名以子母棠
書來索詩余擬更之曰抱女棠卻寄此

篇

史君庭下抱女棠當時定是昌州香慣把酸心
欺月姊不將醉臉媚花王胭脂山色正嬌好半
面妝停自嫌老接葉難垂續命絲分根空發斷
腸草旃檀雖散氣猶存前度春風未改溫三生
洛浦重迴步一縷高唐有返魂葳蕤同倚春陰
綠恰似牽衣初出浴合歡羞說並頭花孝慈巧
附相思竹昔日曾譏楊玉奴只貪春睡不將雛
誰知解語階前樹今見投懷掌上珠遙想低鬟
偷掩面等閒高燭暝人見平陽常指阿嬌憐王
母頻扶玉卮倦無媒齊女莫相疑緋醋青桃父

阿誰從來含笑撩人處便是奇胎墮地時成陰
又過十年久時節如今當嫁否受聘休貪梅最
香宜男祇有蘭如酒

題懷橘圖示王生

等是人閒返哺兒有懷橘處敢嫌疑我今也作
淮南客無復今生負米時

五月五日盱眙道中

日午逢人處年光客暗驚市傭蒲酒鬧村女綵
衣行舊里青溪水何時畫槳聲將軍王鎮惡天
是不重生

題儀徵團蕉墩先生遺像即仿小畫山房

詩體二首

展拜英風凜太阿當時想見筆公呵古懷欲挽
千鈞鼎生計真成一目羅畫餅聲名投濁易碎
琴心事集枯多鳳凰羞逐籠中雉老著寬袍當
釣簑

焚椒讀過浣花篇語語驚人自放顛腫背世應
瞋病馬縮頭我欲學秋鰯解經未盡周正月讀
史猶遲漢八年著糞佛頭徒苦劇唬妝齟笑到
公前

出淮關

此行草草出淮陰
漂絮聲中淚滿襟
雞肋早知逢怒易
豬肝猶覺受恩深
來時春酒無賒處
歸路寒衣有贈金
貧賤何時更酬答
餘生處處負初心

葛潭集遇同學劉生

六合道中

尙有相逢地都驚
白髮新病多拌速
老亂久賸奇貧長
路悲秋日餘生失
母人孤燈同說恨
清淚浣衣塵

明日與劉生別

不盡平生事親棺葬未移有家還待食傳姓況
無兒與我皆同病如今豈死期天涯珍重去衰
朽要勝悲

行經六合

諸軍消息謝知聞社鼓無端鬧夕曛爲見村村
村父醉一時回首望南雲

丙辰正月十三日飲浦口村店題壁

依舊春江寶鏡光試燈風裏暗停觴一年我欲
無佳節十里誰知即故鄉飛渡尙思身有翅聞
歌不覺背生芒從今試問髡頭柳何日容人繫

釣航

將之松江子岷以詩送行作此酬之四首
我本龍門士交君束髮時覆巢同繞樹下榻反
爲師豈不增因果何期重別離舊恩與新分回
首愧經帷

何事此年少春愁如草生 國仇方切齒家難
復吞聲與我共晨夕論文聊慰情天涯來日隔
想望淚宜傾

舊學分明在相期夙好敦文章關壽命憂患亦
天恩努力酬先德清聲副大門由來珍重意仕

隱且休論

君知我貧者此別故難留作客非長策餘生況
白頭浮名資乞食何日草堂休孤負平生志無
家馬少游

過丹陽時聞賊陷江浦已趨而西馳急足
至全椒迎眷屬同往松江

我昔轍困江南鱗扁舟遠附全椒嫻一家竟作
如歸賓十千賃屋許卜鄰豚童鶴叟紛情親雞
犬見客都調馴此鄉風俗純乎純方期銖積賣
賦緡買田長寄皇初民聽鶯遊戲桑根春羨魚

自引襄流綸

桑根山名
襄水名

一年一釀酒最醇能令

鬚髮遲生銀今雖覓食風轉輪冬餘必返天涯

身有家已不愁蓬蘋何圖賊輔江干塵傳聞火

逼臨滁濱西道都在餓虎斷朝發而至不待申

遙知妻女雙眉顰破膽纔補驚魂新出門何處

棲荆榛荒城賊縱哀憐頻

癸丑四月賊北犯
時過全椒未入境

旁

邑或陷齒與脣我無歸路難問津燼餘骨月仍

參辰日長誰指紅粟困鐵鉞能謀幾束薪榆錢

雖多不救貧桃花雖紅不避秦

余所居東曰榆
錢街西曰桃花

塢皆椒
陵勝景

莫辭行路重苦辛及時飛渡江之濬隨

言四
二
我去食千里莼回頭敬謝諸故人若甥若舅恩
尤真但願兵氣銷紅巾閭閻萬瓦全其珍他年
再到神山垠吟窩終築無我瞋我斷不忘香火
因

泊蘇州

胡奴說鬼豈消愁酒盡燈昏夜欲秋涼雨一城
哀角動繫船渾不似蘇州

內子至

鼙鼓連江雨接天累卿遠到海旁邊焦薪近火
魂先奪散藻隨波力易遷離寄事原同鷄雀樓

居時且學神仙

寓屋僅一樓

商量終勝牛衣泣伴我

春聲過數年

爲高篙漁太守題練湖待月圖

天邊無夜月不圓誰能移家上青天眼中有月
無雲煙一住一十二萬年古有神仙亦虛說大
家塵海拜明月清涼世界大歡喜喜是常圓愁
是缺常圓暫缺生光遲微雲飛來點綴之江山
錦繡黯無色狂風盡意橫空吹明知霽宇望中
在舉頭豈免憂來時此時曠野幾人立此時歧
路幾人泣黃昏大有悲聲起處處失羣孤鳥似

投暗先防老蜮知問迷難覓雄螢指不盡哀鳴
盍旦心錯疑長夜茫茫是此輩餘燼不足瞋奏
書我欲天前陳是何使者名結璘後車更有纖
阿神得無白日惟飲醇近來寒卧腳未伸其下
八萬四千戶凡費天錢無算緡虎驕竟似誰家
賓腰斧遊戲星街春坐視寶鏡頑生塵蝦蟆本
無蝕光意不覺漸狎蟾兔馴瓊樓玉宇貪容身
遂令海隅半昏黑十步五步成荆榛冷陰沈沈
霧露惡荒傖鬼鳥唬怖人爝火無名作毒燄驚
魂四散紛青燐要之月豈久磨滅問孰受命司

冰輪雷霆一決穢濁埽請聽下方蟣蝨臣碧翁
翁事何敢言且來待月尋飛軒月光咫尺九閭
下此我聞諸使君者使君來自流沙東恨劍不
快與我同輓粟經過練湖側練湖水綠花流紅
多情招手廣寒府來照東南好門戶畫作清遊
雅步看攬轡澄清心正苦何當月滿銀河秋楚
吳來往長風舟使君酌酒三山頭我輩吟詩萬
里流

七夕五首

鈔二

寄語雙星慰合歡更休清淚夜深彈江南夫婦

重離亂儘有今生一會難

鳩鵲橋非引鳳樓聘錢未了各歸休黃姑落得
無家累不似梁鴻廡下羞

松江早秋日有懷秋舫子岷

秋信江南有落桐算來江北亦秋風菰蕪不是
留人物夜夜揚州入夢中

菱二十韻

此物關民食秋江又采菱貴同蔬入市豐比稻
連塍泥記春池老潮添宿雨澂相看銀鏡影頓
憶璧田芳種傍荷錢浴根妨蒼帶捫珊芽纖脫

穎絲蔓軟交繩葉抱雲生似花隨月拜能囊初
兜綠錦綳漸裏紅綾飛處翎偷雉行時刺礙鯨
瘦腰疑水戲微步想波凌彼美乘舟至清歌隔
浦簷葭邊深倚樹孿末暗牽藤選豔盈筐筐售
珍論斗升霞濃宜甕浸露重得盤承柔笑中無
骨堅瞋外有棱齒痕煩婢代爪力讓兒矜角竟
談餘折脂從洗後凝剝成雙翦玉嚼動一丸冰
非瀉何勞雪如梨亦頗蒸風乾饒旨蓄屈到嗜
還憑

主人齋前玉蘭一株七月中忽開辛夷一

枝漫占此絕

玉樹當時海樣春一花寒趣染脂新誰令老去
秋風裏作盡顏顏苦向人

苦蚤

我靜如枯禪一客不敢見么麼汝誰氏修謁及
寢宴舌端挾鉛鋒來意大不善非蟲亦非蚤曰
蚤苦糾纏夫汝何自來大抵熱土變海隅腥穢
多非種易蔓莖遂孕恒河沙散處偏庭院昌陽
茜酒母桃枝灑濃霰辟汝似辟邪汝不受烹鍊
白日常千人一二隱衣片暑餘習裸身力尙任

驅遣入暮貪新涼當睡意已倦汝乃動大衆無
聲勢潛煽初猶蠕蠕行使我毛孔顫繼皆躁而
跳茵席棘芒桺將無恆苦饑今夕與豪醺醉飽
漸無禮舞蹈作歡抃又疑羣小聚得食怒交戰
爭先一嚙嘗膚革攢著箭我謀生致之將髮當
墨練平縛數十頭帳下示嚴譴手拙難捷獲摸
索暗中徧呼鐙瞬纔停躍去速於電幾回誤豎
指遺糞衾上線逋誅了無蹤藏身黠甚便似畏
齒牙摩報以血花濺幸汝留餘地未渠破吾面
脛股肩背閒頑軀恣齧嚙與汝姑調停忍痛再

一餞且去我欲眠無爲久遲戀況蟲類萬千一
一才技擅或頗吞螫人以人爲鼎膳亦各理人
病而汝不中選抱此塵芥形鑽處即奧援時時
入人幕至竟孰鄉眷數曲辨汝族苦問腹中卷
歧行脰語傳美名儘可羨汝復眇道及可知賊
品賤我雖笑罵汝爲汝作佳傳

秋夜小步涇上待月

獨傍漁燈自在行星河斜轉月初生破橋潮急
野花亂荒驛露多秋樹明珠玉難酬新雨價
鱸虛重此鄉名四邊蟲語喧人耳只有南棲鵲

禁聲

落梧曲寄蔡紫函

琳

落梧復落梧又直秋風初秋風不可說但說梧
葉拙梧葉神太清秋風驕有聲梧葉性太直秋
風怒有力梧葉不辭柯奈此秋風何秋風本寒
信梧葉亦何恨恨負春風心吹出如雲陰春風
底事早惟願成陰好陰成是落時春風不如遲
難道春風錯梧葉自命薄況當春前花便引鳳
作家鳳來棲未定梧葉秋先病破盡青青錢飄
零天海邊春風慮過此梧葉真悔死翻添春風

知君復憶予請述行者難辱君聽何如我貪南
枝棲盡室辭淮淖飄忽一千里五萬錢舟車既
來春申江循江賃敝廬樓居纔三椽臨街婦洗
梳地溼足蟲蚤蝶睡寤蘧蘧朝去入村市莼鱸
嗟虛譽姑覓一飽資薪米鹽醬蔬問價羞探囊
物物奇貨寔尤恨方言歧發聲羣軒渠極意學
蠻語將進瞋超超曷爲遠道來彊顏執人祛豈
不念樂土避風師鷄鵠儻得數載留佳境期食
諸此吾先世鄉雲仍還歸於宛余先世自華亭遷
宛平再遷江寧
詎知苦海波隨去舟逆挈皇天夏不雨溝港泥

皆淤青青田中苗頤委雲葉滑彌月舞桑林禁

及蝦蟬屠

押借

已有游閒民借名耦召耰翦草縛

百龍麇集太守衙

押借

非時欲貸粟其狀狡甚狙

若輩苟苦飢寒野覓橡櫛一旦聚爲盜篋恐白

晝肱憂早且未已疫盛邪挾魑巫穢重舊俗譁

若神言臚夾道盈香花繁唄鍾刈鐻

押借

我家祇

三人次第符繫袂晨熱昏欲酣夜起欣涼蟪蛄

煙常不興鮭菜殍乳蛆典我白布衾藥裏供嚼

咀幾束肘後方待付鈔書胥即以二者論眉顰

安能舒魃尙不足詛魅亦不足祛最憐猢猻王

舌耕非菑畬我初坐經帷弟子前問疋眉目好
若畫比翼鳴鷗鷖性乃不好讀如卧時聞呿勸
勉術既窮下策威仗笱何期主人婦於意大齟
齬謂師職嫺母技胡黔中驢遽代越俎庖使擁
皋比虛本來下客飴冷炙無完牯草具漸不飽
驪歌此權輿尙欲曲彌縫陰豎降城旗傅婢忽
監軍屏後衣見練稍有不措意大聲雷震硯未
辨呵罵誰只合耳貫璩嶽嶽閨房雄有是摯者
睢余雖醜然面客氣久埽除爲師至於此豈復
可忍與況彼翩翩兒藍田雙美璫坐廢無磨礪

自問慚作磻昨已請絕交敬謝乏智諳明知廣
厦稀微命天植噓或者黃塵寬有地容病樗落
魄亦意中竟化枯肆魚滄溟方橫流愧弗樵而
漁置身哀樂外庶幾老死徐頻年梗窮途淚積
河可瀦不知葬鵲血何方茁茹薦得失原雞蟲
譬之綦與樗獨悔燕雀忙營巢甘拮据此行太
拙弄鑄錯奚補苴愁至無斷絕刀思借錕鋹與
君託心知聊復陳欷歔勿爲外人道徒惹纓絕
吟昔別行色嚴方寸窘莫攄諾責償此詩非曰
貢瑤琚藉題一尺扇冀君懷袖儲耐久毋棄捐

情類漢婕妤和也謹再拜並詢君起居霜菊瞬
戒寒努力慎璠璣

今夜

今夜欹吟枕高樓又冷些風嚴雄角語雨重瘦
燈花漸老驚多病長貧恨有家秋蟲亂人意不
睡盼唬鴉

賦得親朋無一字八韻

豈不將書去而無惠我音未應真決絕難道盡
浮沈都有平生分期盟老死心別離猶各夢衰
歇到如今縱或雲遷變何妨話淺深隨時仍盼

望幾處費沈吟他日梅誰寄秋風酒自斟若爲
酬一字還欲抵千金

蟻婚

方晨童聲譁蟻戰在晴塏何事微者蟲外忿中
弗餒孰陰伏而狙孰陽怒而駘我來壁上觀未
覺鬪志倍但見羣蟻旋蠢聚階石礫不辨千與
百作隊墨交彩依依塵土中其狀褻甚猥自餘
殊紛紜雨見熟視每以口欲問訊鬚舉想奉頰
氣或鍼芥投雙珠頻貫琲亦有寡合者往往止
受給身近輒引去形穢若恐浼猶復行勞勞冥

求未肯怠最老數十蟻頭股肉起蕾屹立常不移癡立意有待須臾解而散如罷戲傀儡居然同穴歸徐上高樹瘠若果蟻決戰胡然苟奏凱絕無野棄尸戮力死矛鎧並眇毫毛創回步行折骸我心相然疑良久笑而欵此實蟻婚耳曰戰謬無乃上世巢燧前已閱幾千載婚禮固未與獸行豈無罪義媧兄妹說悖合誅以樞聖人師萬物有術陰主宰度與此蟻同葑菲聽自采事雖近草略怨耦乃寡悔既各私室家何至士遷賄中古設禮防妣氏列寮案姬公書六官典

尙皇邃匪不禁中春會許暫贈蘭茝宰相貴近
情衢巷味調鼎後賢未深思道是莽歆改世近
禮愈嚴女賤自媒隗大節必踰山名教白日曜
惟聞南荒苗小年對蟠髮柳圈金寶璫衣羽競
璨璫跳月桃花天日罔卜子亥意得斯相從豔
歌當聘綵亦此蟻者流然有古風在我今賦蟻
婚譌言忽倒海倘與腐儒談語病索瘡瘍將無
責誨淫難破迂塊礪詎知蟻娛愁聊緩涕淚灌
吾且欲語蟻不見蛟蚪鯁取妻必生子防人持
作醢蟻乎汝非戰民今戰方殆

八月十五夜作

我道今夕月祇是尋常明下界何所愛而以佳
節名比屋忙香花前席瓜果盈百拜齊當天如
見常娥生吳娃妙梳洗鮮衣上街行叩門邀姊
妹有地皆笑聲誰家好子弟打鼓還吹笙豔曲
喧沸鼎巧與紅妝迎來往水中龍不夜疑春城
大抵舉國狂亦自歡腸成秋涼逐殘暑稻熟病
鬼平今年諸郡邑皆歉
於旱而婁田獨豐小年各無事喜氣眉宇
橫良時盛歌舞得意方爭鳴遂覺月十分此鄉
如玉京我昔家青溪夫豈非人情每當今夕前

與客先課晴月下長橋時嘗泛扁舟輕不復羨
舉燭風露良遊清如今一葉命九死魂餘驚依
人等耽贅血淚從誰傾乞援故人書一字無報
瓊薄暮彊命酒未飲神已醒努力差健飯擁劍
欣呼羹蟛蜞雖不可食土人翦其螯之偏大衆
者賣之味不減於蟹而食亦無毒
中獨閉戶胸腹愁有兵不免意灰槁欲樂難支
撐天憐此緒惡新雨來三更催起寒螿曉伴我
吟孤檠

秋蟲

灼艾焚蓮計總非新涼燈火尙依依老將謝世

心逾毒熱慣因人口便肥坐待雙星投暗至夢
回疏雨作聲飛翻憐團扇添餘寵已是捐時更
一揮

秋蠅

何聞何見去來時窗紙重鑽事可知落木天寒
將弔汝食瓜人散更干誰幾多沸鼎趨宜慎爾
許斜陽戀亦癡作盡繁聲都惡劇長吟蟋蟀自
忘飢

解嘲

豈寶柱下言而欲學守雌蓮宗重忍辱亦自非

吾師半生斷斷儒養氣尤自欺琴絃若動殺聲
在長劍未馴夢捉之問卿何爲不男兒君不見
仲孺屈意請蚡宴正平猶聞媚表詞其他忍淚
事可知廁中胯下非難處只要饑寒失路時

蝗至

千里夏無雨江田未盡遲人猶期稻熟天又遣
蝗知難緩神倉漕方增列竈師吳農竟何罪不
在腐儒飢

庭前秋海棠甚盛五六月間傷於旱至九
月初僅有三本作花者蝗墮地復蝕其

一詩以弔之

小草天都忌孤芳似此休秋先桐葉病蟲當稻
花讐漫擬春陰護纔知薄命愁尋常自開落已
是幾生修

余所居樓後樹上多鳥鳴初甚憎之今熟
矣誌慨

日長愁絕惟思夜夜枕纔眠汝喚醒只覺此聲
都未惡可知人語不堪聽

重陽

三年四處過重陽

前年在泰州去年在全椒日
禺中時突有賊警急走二十

五里之北鄉其地已近
滁州矣今年在松江
身比南遷雁更忙貰酒
從人說佳節看花何日歸故鄉樹雖如此春猶
綠我欲不愁風太涼薄暮登樓望書信白雲秋
草路茫茫

將去

不辭荆棘路吾意又天涯未煖羞移席常輸怯
著棊去無餐菊處來是望梅時所得今何物吳
中幾鬢絲

悲來

悲來難放酒顏紅長夜他鄉況雨風萬里音書

蠻府外

方作書寄雲南學使吳和甫師

一家燈火雁聲中身如

孤注翻愁病事已空城不說窮極意周防秋冷
後更停老淚作飄蓬

九月二十四日以妻女去松江將復移江

北是夕宿青浦

飢鴉成隊又西征知有江淮幾日程來事但憑

風定葉此鄉真讓酒稱兵

青浦西城之酒峻於松遠甚

愈驚

秋冷兼霜信欲問余愁在雨聲未用行更防暴

客倘應瞋我舉家清

吳淞江行舟近頻有盜警

舟中遇先祖慈忌日不能設祭感述

半年忍淚在人前寒雨吳淞又客船儻已知聞
到泉下一時黃髮定悲憐

大風雨泊舟

風雨催天黑吳船早住橈村貧疏點火江飽怒
推潮客意去方急秋陰寒更驕誰知此行苦妻
女話中宵

次日風雨更甚舟不能發

何必兼風雨纔成行路難我應窮未至天更虐
多端漸欲酒錢吝空江方晝寒置身無是處前
望意漫漫

五人墓

一死終驚奄騎還只今埋骨萬花閒

墓旁皆蒔花者所居

義風尙恐要離愧後有梁鴻葬此山

舟次夜飲

頭已三年白身幾萬里遊客心當此夜世味賸
孤舟風勁蟲遲語霜深水暗流寒燈倚尊酒寄
意送歸秋

秋蟬吟館詩鈔卷四終

